


मुमकिन ना मुमकिन

अर्जुन देव मजबूर



Source: मुमकिन ना-मुमकिन by Arjan Dev Majboor
Transformed into Standardised Devanagari-Kashmiri by
M.K.Raina.
Work completed on 30.10.2005.

मुमकिन ना मुमकिन

अर्जुन देव मजबूर

येलि पम्पोशस थनु पेयि ब्रह्मा
 येलि क्वदरथ बेयि हेयि नोव जन्मा
 करि 'मानसरोवर' थदि असुनाह
 आकाँश्य खसन स्वनु-साँव्य सदा
 अस्मान्य वुडान यियि पानय 'हर'
मे ति माँज कॅशीरी कॅर्यज़ि खबर

वसि सिरिं उचकस दियि मीठ्य लुकन
 ह्यन शोक नचुन्य येलि स्वर्गक्य वन
 नचि श्रूच 'व्यतस्ता' यारु बलन
 दियि ग्राय 'वेशव' कनु वाजि कनन
 र्वपु-लॅहरन बुख दिन चंदन-सर
मे ति माँज कॅशीरी कॅर्यज़ि खबर

वुज़ि अमृथ येलि र्वपु क्यन नागन
 बुबुराय फोलिथ यिन गुल बागन
 क्वलु-राद नचन डोर्यन-खेतन
 रोव कॅर्य कॅर्य दरती लाल जरन
 बेयि नॅवी बसावन गाम शहर
मे ति माँज कॅशीरी कॅर्यज़ि खबर

चलि गॉसिल साँनिस शोक डलस
 शाह-तोस छलन नीलिस आबस
 यिन पॅरियि दिवय लागन श्रानस
 बेयि च़ाँग्य दज़न प्रथ अस्तानस
 स्वखु-साँव्य फवलन येलि शामु-सहर

मे ति माँज कॅशीरी कॅर्यज़ि खबर

केम्पु क्रुल गलन, वुज़ि म्वख्तु ख्यलन
 अखताबु तिमन दियि मीठ्य वुठन
 शबनम येलि दियि श्रोचर नज़रन
 ख्वश-ब्वयि लम्बख आकाँश्य खसन
 युस डेशि सु पानय सपनि अमर

मे ति माँज कॅशीरी कॅर्यज़ि खबर

ट्रेठाक चलन तहज़ीब फवलन
 स्वयि मूल गलन, सँन्य ज़ख्म बलन
 थदि जोयि वसन, कोह बाल असन
 साँलॉन्य तरन, बापाँर्य तरन
 प्रथ जायि खुलन अमनुक्य दफ्तर

मे ति माँज कॅशीरी कॅर्यज़ि खबर

येलि खोफुक्य अँहरम दूर चलन
 येलि नग्मु लगन मंज़ बोनि-बलन
 येलि मोहरु करन जंगॉर्य पलन
 गछि दूर हजर, करि राज स्यज़र

मे ति माँज कॅशीरी कॅर्यज़ि खबर

येलि केसर-वनु मंज़ु शाल खलन
 क्वंगु डूर्य करन सन्तन अर्पन
 नच्चि 'वादी' ग्वडु कॅर्य लागि ख्वरन
 यिन 'चॅलिमुत्य', नॅव बॅस्ती लागन

मे ति माँज कॅशीरी कॅर्यज़ि खबर

येलि ज़ाथ वुछिन्य तति सपनि मना
 गछि नाँगीरायस पूर मुदा

हीमाल तॅमिस प्यठ सपनि फिदा
पज़ि लोलु कर्यस प्रेमच पूजा
येलि व्वलसुन हेयि अख अख संगर
मे ति माँज कॅशीरी कॅर्यज़ि खबर

'सोपूर्य भजन' गेवि, प्रांरां छुस
पोज़ समयिचि रज़ि निश हारां छुस
गाह वोलां, गाहे थारां छुस
ओश रातस चूरी हारान छुस
येलि चान्यन आशन नेरी तर
मे ति माँज कॅशीरी कॅर्यज़ि खबर

(यि नज़्म छि नामावर सन्तूर-वादक तु संगीतकार श्री भजन सोपोरी साँबस आयितन)

Source: मुमकिन ना-मुमकिन by Arjan Dev Majboor
Transformed into Standardised Devanagari-Kashmiri by
M.K.Raina.
Work completed on 30.10.2005.
